

ALAHADY FAHA 12 MANDAVANTAONA - A



MAHATOKY ANDRIAMANITRA KA RESEO NY TAHOTRA

Ry Kristianina havana, tapitra tamin'ny fankalazantsika tamin'ny fomba manetriketrika ary nataontsika tanatin'ny procession ny fankalazana ny Vatana sy Ra masin'i Kristy sakramenta masina ireo vanimpotoana manokana miditra tanteraka amin'ny mandavantaona isika izao. Fotoana handalinantsika ny finoana. Matoa isika nanao ireny procession ireny dia mba anambarantsika fa tsy lavitra Andriamanitra, Kristy mpiara-belona amintsika, izany no dikany sakramenta masina, eo anivontsika tokoa i Jesoa. Izany no antintranterintsika tamin'ireny procession ireny ka amin'izao Alahady faha 12 mandavantaona izao dia sady voalohany anehoantsika izany finoana izany sy ivelomantsika an'i Kristy, isika no Kristy velona, isika no Kristy mpiara-belona amin'olona amin'izao mandavantaona izao ka anambarantsika an'izany eo amin'ny fianantsika andavanandro. No faharoa handalinantsika ny finoantsika an'i Kristy mpiara-belona miaingy amin'izany no anambarantsika koa fa isika fa motoa mandalina

Vakiteny I : Jer. 20, 10-13
Tononkira : Salamo 68
Vakiteny II : Rôm 5, 1 2-15
Evanjely : Mt. 10, 26-33

ny finoana isika dia mba hahafantarantsika fa iza marina moa i Jesoa izay teny mahavelona ka hivelomantsika amin'ny fiainantsika andavanandro mba hahazoantsika ny famonjena. Izany no ampianarin'ny vakiteny telo arosan'ny Eglizy amin'izao

Alahady faha-12 mandavantaona izao, azo lazaina fa na manao akory ny adim-piainana tsy maintsy atrehina, na manao akory ny fiainana mety manahirana, na dia mety ho tonga aza ny hoe very fanahy mbola velona ka tsy ho hita intsony izay aleha dia fantaro fa tsy miova Andriamanitra, efa nanolotra an'i Jesoa izy ary izy no lâlana sy fahamarinana sy fiainana ka aoka tsy hatahotra isika hahatoky an'Andriamanitra. Izany

no fotom-pampianarana tian'ny Eglizy ho azontsika androany Alahady faha 12 mandavantaona rehefa avy nanao ireny fankalazana maro isankarazany ireny isika.

Aza varimbariana, aza matahotra fa mifikira amin'Andriamanitra, aoka hivahatra amin'Andriamanitra ny fiainantsika raha tsy izany mety ho potika ny fiainantsika raha tsy miaraka aminy. Fantaro fa ny aina tsy ananandroa, ilay tokana ny aina ary mamy ny aina ka raha tiantsika hanana an'izay fiainana izay isika dia aoka hivahatra amin'Andriamanitra ny fiainantsika manontolo.

Ambaran'i Jeremia mpaminany ao amin'ny vakiteny voalohany (*Jer. 20, 10-13*) : raiki-tahotra tokoa i Jeremia ao amin'ny vakiteny voalohany io, very fanahy mbola velona izay mitovy amintsika amin'izao ary nanontany tena aza izy hoe iza no mety hanafaka ahy amin'izao t'nan'ny ratsy fanahy izao. Mitovy amin'izany koa isika rehefa tojo ny mafy satria tokana ny aina ary mamy ny aina ka mampatahotra ny fahafatesana fa eo indrindra Andriamanitra mankahery antsika ary ao anatin'ireny ady sarotra ireny no isehoan'Andriamanitra amintsika. Noho ny finoantsika dia afaka handresy an'ireny zavatra mampatahotra ireny ka velom-piderana sy velom-panantenana tokoa isika ao amin'Andriamanitra. Izany no tian'ny Eglizy ho tsapantsika ka hidirantsika amin'ny mandavantaona : Aoka tsy hatahotra isika, matokia an'Andriamanitra, izy no manafaka antsika amin'izay mampahory antsika, aoka tsy hatahotra isika fa hahatoky an'Andriamanitra.

Izany no ambaran'i Jesoa ao amin'ny Evanjelin'i Md Matio (*Mt. 10, 26-33*) : aza matahotra ianareo hoy Jesoa tamin'ny Apôstôly, aza matahotra ny olona ianareo fa tsy misy takona izay tsy aseho na ny miafina izay tsy ho fantatra. Ny tadiavin'i Jesoa amintsika dia ny hivelona ny finoantsika ho vavolombelona tsy hatahotra ny maha Kristianina antsika satria isika izao no Kristy mpiara-belona amin'olona, aoka ambarantsika ampahibemaso ny finoantsika.

Ny tahotra sy henatra no matetika mahavoasarika antsika etsy sy eroa ka mahatonga antsika voasarikan'i Jesoa piraty sy mivary lavo amin'ny fiainana, aoka handeha amin'ny originale isika dia i Jesoa izay ambaran'ny tenin'Andriamanitra, izay ambaran'ny Eglizy Katolika Apôstôlika Romana. Ireny no ambarantsika eny ambony tafon'ny trano, aza matahotra izay mamono ny vatana fa tsy mahay mamono fanahy. *"Aza matahotra ny olona ianareo, fa tsy misy takona izay tsy haseho, na miafina izay tsy ho fantatra. Izay lazaiko aminareo ao amin'ny maizina dia ambarao eo amin'ny mazava; ary izay bitsibitsihina amin'ny sofinareo, torio eny ambony tafon-trano; ary aza matahotra izay mamono ny vatana, fa tsy mahay mamono ny fanahy, fa aleo matahotra izay mahay mamarina ny vatana sy ny fanahy any amin'ny afobe"* Mt 10, 26 -28.

Aoka ho vonjentsika ny fanahintsika eo amin'ny zavatra maro mandalo, aoka ho i Jesoa mpamonjy no raisintsika araka voalazan'i Md Paoly ao amin'ny vakiteny faharoa (*Rôm 5, 1 2-15*) : aoka hiombona amin'i Jesoa isika fa izay fiombonantsika aminy izay no azahoantsika ny fiainana mandrakizay, io no ambaran'i Md Paoly, olona iray dia Adama no niavian'ny fahotana sy ny fahafatesana fa ny fanafodin'ny fahafatesana sy izay mety mampatahotra

antsika ka manankorontana ny fiainantsika dia ilay ADAMA VAOVAO i JESOA KRISTY ka raha miombona aminy isika dia miombona amin'ny fitiavan'Andriamanitra ka na inon-kidona na inon-kiatra handresy an'izany isika ry Kristianina havana. Aoka tsy hatahotra, aoka hahatoky fa ao amin'i Jesoa no hahazoantsika ny fiainana satria raha mandà an'i Jesoa isika dia tsy ho eken'i Jesoa eo anatrehan'ny Ray izay any an-danitra fa izay manaiky azy kosa dia ho ekeny eo anatrehan'ny Ray. Midika izany fa i Jesoa no tena avocat ho antsika, izy no tena làlana hahafahantsika mandeha any amin'ny Ray ka tsy misy zavatra tokony hatahorantsika intsony f'efa miombona amin'ny Ray isika.

Ry Kristianina havana, maro ny zavatra mety mifamahofaho amin'ny fiainantsika, maro ihany koa ny tsy sahy mijoro ho vavolombelona, manana modely isika, manana mpivavaka isika dia i Lucien Botovasoa, aoka ho tahaka azy isika ho mpianatra mahatoky. Mivavaha isika mba hiroso hatrany handalina ny finoana ka ho finoana velona tokoa ny finoantsika, ho tany lonaka tokoa ny finoantsika ka na inon-kidona na inon-kiatra dia ho tena vavolombelona manambara an'i Kristy isika. Isika izao no Kristy mpiara-belona amin'olona, hanambara amin'olona ny tena hasambarana sy hafaliana.

Enga anie ry Jesoa Kristy Tompo mba ho raisinao tena mpianatra izahay, ataovy ho anisan'ireo apôstôlinao izahay hitarika an'ireo namanay hahalala anao fa ny mahalala anao no mahazo ny fiainana mandrakizay. Amen

Mompera Arseveka Mgr Benjamin Ramaroson